



Minggu, 07 Pebruari 2021

Ogen: Job 1:1-5



Notoken Anak Jabu



Lit singatakenca úgapa pe suksesna kita i darat, ibas ingan erdahin, kujah kuje kita tapi mulih ka nge kita ku rumah, ku keluarganta. Bage belinna erti ras fungsi keluarga ibas geluhta. Keluarga ntah pe isi jabu me si ndukung, ngarak ngarak kerina kecibal geluhta. Ia me sihadir ibas kerina paksa si lit, senang susah ntah pe sehat bagepe sakit. Eme gegeh ras semangat ibas kegeluhenta. Dikune keluarga la ndukung, la jadi teman tentuna sehkal lungen ras aruna ate nggeluh. Bage me ibas paksa ngalaken pandemic covid 19 enda, keluarga ntah pe rumah jadi ingan sipaling nyaman. Sabab enggo buen kita isuruh i rumah, erdahin, erlajar, erkebaktin ras sidebanna. Enda ngatakensa fungsi keluarga luar biasa ibas kegeluhenta.

Arah renungenta enda, mabai kita kerna kegeluhen Job si bayak namura. Ibas kerina si lit ibas ia, iingetna maka tanggungjawab ras fungsina selaku bapa. La saja ertanggungjawab nikapken kebutuhan pangan inemen (daging kula) tapi pe secara pertendin (rohanina). Ia sebage Imam ibas jabu, arus ndidik ras njagai anak ibas erbage kesalahen ras pengaruh si la uli. Emaka tanggungjawabna guna notoken anak anakna. Gelah ula kena rawa Dibata ibas perbahanen. Enda me si ilakoken Job ibas wari-wari kegeluhenna.

Nai nari seh asa genduari, pendidiken kiniteken ilakoken ibas jabu. Keluarga me inti pendidiken ras ingan erlajar kerna kegeluhen. La saja ibas hal pendidiken, sosial, budaya tapi pe kiniteken (iman). Salah sada hal positif si perlu si idah ras siergai maka ibas paksa covid enda ipersingetina kita kerna dahin ras tanggungjawab sebage orangtua, eme pembinaan kiniteken isi jabu. Janah mari ula lupa jadi pendoa sapaat nandangi anak-anakta ras kegeluhenta.

inget tanggungjabta sorangtua, la saja ncukupken keperluan jasmani